

明紀事本末補編 上

涵芬樓秘
笈第五集

明朝紀事本末補編卷一

海鹽彭孫貽羿仁氏著

祕書告成

元至正二十六年五月上命有司訪求古今書籍藏之祕府

吳元年丁未十一月太史院劉基以所定戊申歷進

洪武元年戊申春正月中書省御史臺以所修大明律令進
四月命學士朱升等修女誡

洪武二年八月元史成

洪武三年三月置祕書監 九月大明集禮成凡朝會燕
享樂舞升降儀節制度名數纖悉備具通計五十卷

洪武十二年大明志成編類天下山川州郡形勢降附始
末

洪武四年正月御史臺進擬憲綱四十條上覽之親加刪
定 七月存心錄成

洪武六年正月詔孔克表等取諸經要言以恆言釋之名
曰羣經類要 上命陶凱等采擇漢唐以來藩王善惡爲
書名曰昭鑒錄以頒賜諸王 五月祖訓錄成其目十有
三曰箴戒曰持守曰嚴祭祀曰謹出入曰慎國政曰禮儀

曰法律曰內令曰內宮曰職制曰兵衛曰營繕曰供用
七月宋濂奉詔搜萃歷代奸臣之蹟編爲辯姦錄 十一
月詔刑部尙書劉惟謙詳定大明律篇目一準之于唐令
六百有六條分爲三十卷命頒行天下

洪武七年五月纂修大明日歷成自上起兵臨濠踐天位
以至六年冬十二月凡征伐次第禮樂沿革刑政施設羣
臣功過四方朝貢之類莫不具載合一百卷詹同宋濂率
諸儒上進命藏之金匱其副藏于祕書監濂等又請如唐
太宗貞觀政要分類更輯聖政爲書自敬天至制蠻夷釐
爲五卷名曰皇明寶訓 十一月孝慈錄成編定喪服之

制十二月御註道德經成

洪武八年正月宋濂以上所行關於政要者編集成書曰
洪武聖政記二月御製資世通訓成凡十四章君道臣
道外凡民用士用工用商用等十一章皆申戒士庶之意
詔刊行之三月洪武正韻成上以舊韻起于江左多失
正音命學士樂韶鳳與諸廷臣以中原雅音校正之

洪武十二年閏五月編春秋本未成上以春秋本諸魯史
而列國之事錯見究其終始艱于考索乃命東宮文學傅
藻等纂錄分列國而類聚之事之終始秩然有序曰春秋

本末

洪武十三年六月臣戒錄成時胡惟庸事覺上乃命翰林
纂錄歷代諸侯王宗戚宦官之屬悖逆不道者凡二百十
二人備其行事以類書之名臣戒錄頒布中外之臣 七
月罷祕書監凡內府書籍悉翰林典籍掌之

洪武十五年正月命翰林侍講火原潔等編類中外譯語
洪武十六年二月命吳沉以敬天忠君孝親三事類編成
書曰精誠錄

洪武十七年閏十月大明清類天文分野書成

洪武十八年十月頒大誥

洪武十九年三月頒大誥續編 省躬錄成編漢唐以來

災異之應于臣下者 十月頒志戒錄采輯秦漢唐宋爲
臣悖逆者百有餘事賜羣臣及教官諸生講誦使知鑒戒
十二月頒大誥三編上親序之被誅貪贓官吏一切作
奸犯科姓名具列誥中凡臣民要務家藏人誦以爲鑒戒
倘有不遵遷于化外其有大誥者偶有所犯減等科罪

洪武二十年二月御註洪範成

洪武二十一年七月頒武臣大誥上以中外武臣出自戎
伍固知憲典往往麗法乃親製大誥三十二篇以訓之

又以鉏麑樊噲金日磾張飛鍾會尉遲敬德薛仁貴王君
廓僕固懷恩劉闢王彥章等所爲善惡爲一編曰武士訓

戒錄 十一月頒賜武臣保守勅

洪武二十二年八月更定大明律

洪武二十三年十月詔刊韻會定正時洪武正韻頒行已久上以其字義音切未盡當命翰林重加校正學士劉三吾言前太常博士孫吾與所編韻書本宋黃公紹古今韻會凡字切必祖三十六母音韻歸一因以其書進上覽而善之賜名韻會定正命刊行之 命修孟子節文凡不以尊君爲主如諫不聽則易位及君爲輕之類皆刪去 十

二月購遺書

洪武二十五年八月頒醒貪簡要錄于諸司

洪武二十六年諸司職掌成 頒示稽制錄于諸功臣以
遏其僭奢 十二月輯歷代宗室諸王爲惡悖逆者曰永
鑑錄以賜諸王又輯歷代爲臣善惡爲勸懲者別爲書名
曰世臣總錄以頒示中外羣臣

洪武二十七年寰宇通志書成時天下道里縱一萬九百
里橫一萬一千七百五十里四彝不與焉 上以蔡氏書
傳註說多未安者命儒臣凡得者存之失者正之又集諸
家之說足其未備名書傳會選

洪武二十八年閏九月皇明祖訓成 十一月禮制集要
成 十二月洪武志成其書述都城山川地理封域之沿

革宮闈之制度壇廟寺宇街市橋梁之建置更易靡不具載十一月詔翰林院議定制度凡官民房屋墳塋等第及食祿之家禁例爲書名曰稽古定制

洪武三十年正月頒爲政要錄其書載文武官屬體統及僉書案牘次第軍士月給廩餚與宿衛之禁屯田之政凡十有三卷五月大明律誥成

建文三年十二月太祖高皇帝實錄成

永樂元年十二月解縉奉勅修古今列女傳成

永樂二年四月命侍臣輯古今嘉言善行有益于太子者爲書以授太子名文華寶鑑三年六月重修高皇帝實

錄成

永樂四年四月命禮部遣使購求遺書

永樂五年十一月以仁孝皇后內訓賜羣臣俾教于家
上諭解縉等曰天下古今事物散載諸書不易檢閱朕欲
悉采各書所載事物名數聚類而統之以韻庶便考索嘗
觀殷氏韻府等書采擇不廣爾等將自有書契以來凡經
史子集百家天文地志陰陽醫卜僧道技藝之言備輯爲
一書毋厭浩繁縉等輯成于二年十一月上之賜名文獻
大成既而上覽其書更多未備復命姚廣孝等重修至是
始成凡二萬二千二百一十一卷一萬一千九十五本更

賜名永樂大典上親製序以冠之此書後竟以卷目太繁不及刊布而廢

永樂七年五月賜皇太子聖學心法書

永樂八年十月上以皇孫生長深宮欲其知稼穡之艱難因巡行北京命之侍行使歷觀民情風俗及田野農桑勞苦之事且舉太祖創業之難及往古興亡可爲鑑戒者以致飭勵之意名務本之訓云

永樂十三年九月五經四書性理大全書成先是十二年十一月上諭胡廣楊榮金幼孜曰五經四書皆聖賢精義要道傳註之外諸儒議論有發明餘蘊者爾等采其切當

之言增附于下其周程張朱諸君子性理之言如太極圖
通書西銘正蒙之類皆六經之羽翼然各自爲書未有統
會爾等亦聚類成編三書務極精備庶垂後世至是書成
上親序之命禮部刊刻頒行天下 上以璽書諭皇太子
令翰林儒臣黃淮楊士奇等采古名臣奏疏彙錄以便觀
法至十四年十二月書成上覽而嘉之賜名歷代名臣奏
議

永樂十七年三月爲善陰隲孝順事實二書成先是上閱
載籍遇有爲善獲報者命近臣輯錄之得百六十五人名
爲善陰隲尋復輯錄古今孝順之事可以垂訓者得二百

七十人名孝順事實上皆製序冠之命賜諸王羣臣及國子監天下學校 九月上嘗覽列仙傳因命侍臣博采重加纂輯賜名神仙傳上親製序冠之

洪熙元年五月修成祖文皇帝實錄成 閏七月修仁宗昭皇帝實錄

宣德元年四月御製外戚事鑒及歷代臣鑒二書成
宣德三年二月御製帝訓及官箴二書成
宣德五年重修玉牒成

正統三年四月宣宗章皇帝實錄成

正統十年三月五倫書成凡六十二卷

景泰五年七月詔頒君鑒錄于羣臣吏部侍郎李賢擇其
善爲可法者二十二君每君擇取最切要者三四事集爲
鑒古錄上之

天順五年四月大明一統志成先是永樂中令夏原吉等
纂修天下郡縣志未成景泰中更名寰宇通志修成未刻
天順三年更名大明一統志令李賢等重修至是成凡九
十卷遂刊布焉

成化三年八月英宗睿皇帝實錄成

成化十二年十一月續資治通鑑綱目成景泰五年勅儒
臣倣朱文公例纂修宋元史書上接資治通鑑綱目至是

成上爲之製序

成化十四年五月儒臣編輯御製詩集成凡四卷五百八十九首

成化十八年十二月御製文華大訓成訓皇太子

弘治四年八月憲宗純皇帝實錄成

弘治十三年問刑條例成時法司苦累朝條例繁多上命
刪定畫一頒中外行之

弘治十六年正月大明彙典成先是十年上以累朝典制
未會于一乃勅儒臣分館編集之其義一于諸司職掌爲
主使官各領其屬而事皆歸于職以備畫一之制至是成

凡一百八十卷 命大學士李東陽等修歷代通鑑纂要
十月南京兵部郎中婁性上皇明政要四十篇

正德四年五月孝宗敬皇帝實錄成

嘉靖七年六月明倫大典成是年頒御製敬一箴程子視
聽言動箴范氏心箴五註于學校

嘉靖九年御製正孔子祀典說成

萬歷元年帝鑑圖說成